

Borgmesterit borgmesteritut atuunermik saniatigut aallaavittut allamik suliffeqarsinnaanerannik suliffimilluunniit ingerlatsisinnaanerannik pisinnaajunnaartitsisumik, Naalakkersuisut kingusinnerpaamik UKA 2017-imi kommunit aqunneqarnerat pillugu Inatsisartut inatsisaanut allannguutissatut siunnersuummik saqqummiussinissamik peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Ane Hansen, Inuit Ataqatigiit)

Akissuteqaat

(Kommunit, Nunaqarfinnut, Isorliunerusunut, Attaveqaqatigiinnermut, Ineqarnermullu Naalakkersuisoq)

Aappassaaneerinnineq

Aalajangiiffigisassatut siunnersuut suliarineqarneranut atatillugu Inatsisinut Ataatsimiititaliap sukumiisumik sulineranut Naalakkersuisut sinnerlugit qujassutigiumavara.

Inatsisinut ataatsimiititaliaq isumaliutissiisummik saqqummiussereerput, tassanilu aalajangiiffigisassatut siunnersuut itigartitsissutigineqarnissaa ataatsimiititaliami amerlanerussutillit inassutigaat.

Inatsisini atuuttuni borgmesterit borgmesteriunerup saniatigut suliffimmik inuussutissarsiummilluunniit allamik ingerlatsisinerata kingunerinik soqutigisat aporaassinnaanerannut aarlerinaatit killilersorneqareernerat, Ataatsimiititaliami amerlanerussuteqartut immikkut pingaaruteqartissimavaat. Aammattaaq pingaartumik namminersorlutik suliffeqarfiullit borgmesteritut sulilernissaat ajornakusoortitsissaaq, taamaattoqassappammi suliffeqarfiutertik taamaatiinnanngikkunikku tunisariaqassagamikku.

Taamak oqaaseqarlutik Naalakkersuisut aalajangiiffigisassatut siunnersuut saqqummiunneqartoq itigartitsissutigineqarnissaa inassutigaat.